

Mazarin  
Suppl. 1  
96

Roquette

Harangve faite a l'ovvertvre...



RARE BOOK  
COLLECTION



THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL

Mazarin  
Suppl. 1  
96

UNIVERSITY OF N.C. AT CHAPEL HILL



00023020204



493  
H A R A N G V E  
FAITE A L'OVVERTVRE  
DV PARLEMENT  
DE PROVENCE,  
PAR MONSIEVR LE  
Baron de la Roquette, second  
President audit Parlement.

*Au mois d'Octobre 1651.*



A P A R I S,  
De l'Imprimerie de la Veufue l. GUILLEMOT, rue des  
Marmouzets, proche l'Eglise de la Magdelaine.

---

M. DC. LI.





*H A R A N G V E F A I T E A L' O V-  
uerture du Parlement de Prouence, par Mon-  
sieur le Baron de la Roquette, second President  
audit Parlement, au mois d'Octobre mil six cens  
cinquante-vn.*



Es Estats ne sont point immortels non plus que ceux qui les regissent. Tout ce qui naist meurt, & tout ce qui commence doit finir. Ce grand ouurage mesme du monde, en qui l'on ne voit aucune marque de sa decadence, que personne n'a iamais veu vieillir, & que tant de grands Genies ont creu eternel, cessera d'estre quelque iour, & de tout ce qu'il est repassera à son premier neant. En cette fatalité commune à toutes choses, il n'est rien qui ne tende à la conseruation de son estre : celles qui sont priuées de tout sentiment y vont d'elles-mesmes, par vn aueugle & immuable inclination, qu'elles ont d'obeyr aux loix, que la nature leur a prescriptes : Les autres y sont portées par l'amour d'elles-mesmes, & rien ne les en scauroit diuertir que le mauuais choix qu'elles font, de ce qui les peut ou conseruer ou détruire.

Les maux qui arriuent de cette eslection ne regardent point les bestes, comme elles n'ont point l'auantage de pouuoir faire du bien, elles n'ont point aussi le desauantage de pouuoir faire du mal, puisque l'un & l'autre requierēt le consentement, & qu'elles n'en ont point : voila pourquoy leur durée va iusques où elle peut aller, si quelque cause exterieure ne l'arreste. Il n'en est pas de mesme des hommes : la plupart du temps ils s'ouurent eux-mesmes les chemins qui les meinent à leur ruïne, de sorte que le plus souuent, eux seuls se trouuent complices de leur perte. Ce n'est pas que le Ciel leur ait osté la liberté ny le pouuoir de se rendre heureux. S'ils



rencontrent des obstacles en l'acquisition de leur felicité, ils viennent de leurs propres desreglement : & s'ils ne sont pas ce qu'ils peuvent raisonnablement souhaiter d'estre, c'est, où qu'ils ne le veulent pas, ou qu'en le voulant, ils prennent des moyens qui ne seruent qu'à les en empêcher.

Aux premiers siecles, les esprits n'estoient susceptibles d'aucune crainte, aussi n'y auoit-il rien à apprehender : les noms de crime, de vice, de Prince, de Magistrats, & de Loy, n'estoient pas encore en vsage : & bien que les vertus toutes pures & toutes nettes fussent parmy les peuples, à peine les peuples cognoissoient-ils ce qu'ils pratiquoient en les pratiquant : Tout ce que la consideration de l'honneur fait parmy nous, la candeur naturelle, & la probité le faisoient parmy eux, ainsi se tenans inuiolablement dans les bornes de la société humaine, les vns & les autres viuoient dans l'innocence : chacun croyoit la terre mere commune de tous ; & comme personne n'auoit rien qu'il ne s'imaginast estre à son semblable aussi bien qu'à luy, nul differant ne troubloit son repos, tout estoit calme dans le monde.

Depuis cette tranquillité si profonde & si vniuerselle, se trouua alterée par ceux à qui la naissance donna, ou les avantages du corps, ou ceux de l'esprit : la bonne opinion qu'on commença de concevoir de soy, fit naistre l'ambition, & l'ambition, la passion de commander aux autres, & de s'en faire obeyr. En ce nouveau desordre, les plus foibles se virent oppressez par les plus forts, & les moins habiles seduits par plus clairs-voyans : Mais comme personne ne s'estimoit nay pour la seruitude, les plus ambitieux, pour paruenir au but qu'ils s'estoient proposé, se treuuerent obligez d'en venir à la force, & extorquerent par la crainte ce qu'ils ne peurent obtenir par la douceur. La fureur de commander n'en demeura pas là : les vsurpateurs mesmes de la liberté d'autrui, conceurent de la jalousie les vns du pouuoir des autres, & commencerent à se quereller pour la possession d'une chose, qui n'appartenoit à pas vn d'eux.

Voila d'où vint l'origine des guerres, d'où nasquirent les inuasions, les infidelitez, les meurtres, les carnages, & les autres maux dont nous voyons encore à present les Estats affli-

444.037  
17475 AL  
X.S  
No. 1



gez. Comme alors la souueraine puissance estoit vn auantage abandonné au premier qui s'en pouuoit emparer, personne n'obeïssoit qu'à regret, & autant de temps seulement qu'il se trouuoit dans l'impuissance de secoüer le joug, nulle affection ne lioit ceux qui estoient commandez, avec ceux qui commandoient : La crainte & la violence estoient les fondemens des plus fermes dominations : Le flux & reflux des frequents & subits changemens qui arriuoient dans ces naissantes dominations, rendoient d'autant plus les peuples miserables, qu'ils changeoient souuent de maistres, & qu'ils ne sçauoient jamais surquoy ils deuoient asseurer leurs esperances ny leurs craintes ; Enfin ne pouuans demeurer d'accord, ny des moyens de reestabliir leur liberré, ny de la patience qu'il falloit pour la souffrir assujettie sous tant de pouuoirs injustes ; le Ciel esmeu de leur misere les fit condescendre à donner à vn seul l'authorité qu'ils osterent à tous les autres. Ils demanderent des Roys, & Dieu leur en donna pour en estre protegez : Deslors les sujets se despoüillerent de tout leur pouuoir pour le mettre entre les mains de leurs souuerains : Ils leurs iurerent vne aueugle obeyssance, & leurs personnes leur furent si sacrées, qu'apres Dieu ils n'eurent rien de si cher qu'eux, & tout ce qui les touchoient de près ; le Ciel se rendit le plege d vn serment si solemnel, & promit de descharger son couroux sur tout ce qui viendroït à le violer.

A considerer tous les Estats dont la durée nous rameine à l'admiration de leur gloire, nous n'en voyons pas vn où l'institution des Souuerains n'ait esté immediatement suiuite de celle des Magistrats & des Loix, deux choses sans lesquelles & les sujets & les Roys demeurent d'accord que la puissance absoluë ne pouuoit subsister, Comme vn seul auoit à recompenser les vertus & punir les vices, à composer tous les differends qui naissoient parmy ceux qu'il auoit à regir, comme il auoit à songer à leur seureté, & les garantir de toutes sortes d'oppressions, ne pouuant pas estre par tout pour s'acquitter dignement d vn si vaste employ, force luy fut de consigner son authorité entre les mains de plus gens de bien qui la pouuoient maintenir en son absence, & qui furent establis pour voir tout, pour entendre tout, & qu'à l'exemple des Perses,

nous



nous pourrions nommer les yeux & les oreilles du Prince; C'est, pour cette raison que les Anciens ont donné à la Justice la Balance & l'Espée, c'est pour ce sujet mesme que les Magistrats ont esté par tout en singuliere veneration.

Aussi certes le respect qu'on leur a porté iusqu'icy a esté tousiours referé à celuy que l'on doit au Prince, pour tesmoignage d'un deuoir si iuste & si legitime, Chez les Grecs nul ne rendoit la Justice que le Sceptre à la main; & l'Empire Romain n'a veu iamais marcher ses Magistrats sans les haches & les verges, ou quelque autre marque de superiorité.

Ce que Dieu est aux Roys, les Roys le sont aux Magistrats, & ce que les Roys sont aux Magistrats, les Magistrats le doiuent estre à ceux sur lesquels ils exercent la Justice. En toutes sortes de Gouuernemens le deuoir & l'obeyssance marchent par ces degrez, & ne s'en peuuent esloigner sans que l'harmonie par laquelle subsistent le corps des grands Estats en soit alterée. Le mespris des Ministres est celuy des Souuerains, & celuy des Souuerains celuy de Dieu. Les Anciens Theologiens rapportent la conspiration que les Geans firent contre les Dieux au premier voyage que la Deesse Astree fit au Ciel, à peine leur eut-elle tourné le dos, qu'ils arracherent les montagnes de leurs fondemens, qu'ils les entrassent les vnes sur les autres pour se rendre les maistres de leurs maistres, & s'esleuer par le crime à la felicité à laquelle ils n'auoient pû pretendre par leur vertu.

Les plus grands desordres qui esclattent dans les Estats, naissent de foibles commandemens, qui rarement viennent à la connoissance de ceux qui les regissent, que lors qu'ils sont en leur plus grande vigueur: Le deuoir des Magistrats est de les estouffer en leur source; Pour le pouuoir, il faut que les peuples ayent le respect qu'ils doiuent auoir pour leur authorité, & que les Souuerains eux-mesmes maintiennent la puissance qu'ils leur ont consignée; L'exemplaire des plus grands & des plus heureux Monarques qui ayent iamais regné dans le monde, auoit fort bonne grace, quand parlant de la Justice, il disoit qu'il auoit vne Maistresse dont il vouloit que tous ses sujets fussent amoureux comme luy; Il adjou-



oit que par le moyen de sa beauté, il auoit estendu les bornes de la Grece iusques aux extremitez de l'Asie, que par elle il laissoit à ses enfans tout ce qu'il auoit iamais conquis; & que par elle la paix, la concorde, obeyssance & la sainteté de mœurs regnoient parmy ses sujets; enfin que comme par elle il auoit tousiours vescu heureux, il mouroit, aussi heureux en laissant à ceux qui deuoient regner apres luy.

L'amour que ce glorieux conquerant auoit pour cette rare beauté, nos Rois l'ont tousiours eu pour elle, & le dernier auantage qui manqua à sa felicité, qui estoit de l'attacher inuiolablement au cœur de ses enfans, ceux qui ont regné sur nous l'ont eu tout entier: Les fils de ce Prince se perdirent dès qu'ils commencerent à tesmoigner du mespris, ou de l'indifferance pour elle; & les enfans de nos Roys par la veneration qu'ils ont eu pour elle, ont estendu leur gloire au delà des vœux mesmes de leurs subjets: Qui de nous ignore avec quelle passion le dernier de nos Souuerains la rendit venerable dans ses Estats? Avec quelle satisfaction il voulut quitter le nom de tres. Grand, tres. Victorieux & tres. Magnanime pour prendre celuy de Iuste? Celuy sous lequel nous viuons aujourd'huy, que le Ciel nous a donné par vn miracle extraordinaire, & dont la ieunesse appuyée par l'amour & par les soins de la meilleure Mere, & plus grande Reyne du monde, nous donne de si belles esperances, ne semble-t'il pas auoir herité des beaux sentimens que le feu Roy son pere de tres-glorieuse memoire auoit pour la Iustice: Avec quelle bonté, & avec quelle affabilité n'a t'il pas receu ses Ministres toutes les fois que la necessité des affaires & leur propre deuoir les ont portez auprès de sa Majesté? Avec quelle fermeté n'a-t'il pas fait subsister leurs Arrests? Avec quelle religion ne veut-il pas qu'on y obeysse? Il sçait que tout ce qui se fait par eux ne vise qu'à la manutention de son autorité; que la leur est la sienne propre, & que qui-conque tâche à se soustraire de leur Iurisdiction, ne sçauroit auoir de bonnes pensées pour son Prince naturel, puis qu'en ses Ministres il perd le respect qu'il luy doit.

Les Anciens disoient que toutes choses estoient dans le cahos; mais qu'on pouuoit dire qu'il n'y en auoit pas vne,



parce qu'estant dans le desordre & la confusion, nul discernement n'en faisoit connoistre aucune : L'harmonie n'est plus harmonie, elle passe en son contraire lors qu'on touche vne corde pour l'autre, ou qu'il y a quelque obstacle au chemin que le son doit faire pour se rendre agreable à l'oreille; qu'auroit l'homme en luy qui ne luy fust pernicieux, & qui ne le rengeast au nombre des plus effroyables monstres dont on a iamais ouy parler, s'il perdoit l'ordre & la simmetrie qu'il tient de la nature? Dequoy luy feroit l'usage de ses membres, de ses organe & de ses sens, si les vns vouloient faire la fonction des autres? Que verroit-il s'il falloit qu'il vist des mains, & quel fruit tireroit de l'attouchement s'il estoit obligé de toucher par l'odorat; ce que nous disons de ces deux sens, nous le disons de tout le reste qui est non seulement en l'homme, mais encore de tout ce que l'on voit en toute la nature.

Si l'ordre est necessaire en aucune partie de l'Estat, il l'est principalement dans la Iustice : sans luy, il est impossible que cette Reyne des vertus par les soins de laquelle les Roys scauent ce qui plaist à Dieu, les Magistrats ce qu'il plaist aux Roys, & les peuples ce qu'il plaist aux Magistrats, puisse agir comme il est à desirer pour le salut du genre humain. En toutes sortes de Gouuernemens où la crainte de Dieu a tenu les peuples en bride, la Iustice s'est partagée elle mesme avec tant de discretion, de iugement & de miracle, que bien qu'elle semble demembrée, elle ne laisse pas d'estre toute entiere en tous les endroits où elle est : qui la fuit en vn lieu la trouue en vn autre, parce qu'elle est tousiours par tout. Ceux qui se deffians de leur droict, declinent vne Iurisdiction pour en auoir vne autre, ressemblent aux ieunes debauchez, qui pour auoir la liberte de courir à leur ruine avec plus de precipitation, souhaitent l'éloignement de leurs peres, & quelquefois leur mort. Les Officiers ne scauroient receuoir vn plus sensible déplaisir, que d'estre tenus pour suspects : Les loix leur donnent le pouuoir de se iustifier, & de rendre infames ceux dont la crainte les charge d'infamie : avec tout cela, comme leur naturelle douceur les porte à laisser leur vengeance; au repentir que la verité peut donner de la faute



qu'on fait en cela, ils employent tous leurs soins à ramener les esprits, & les remettre dans la Jurisdiction où la nécessité des Loix & des Ordonnances les oblige de répondre. Nous sommes & serons tousiours dans le mesme sentiment : Nous protestons de quitter pour iamais le souuenir de tout ce qui nous peut aigrir, & sans interest & sans passion, de rendre Iustice également à tous, afin de nous acquitter du serment que nous auons fait à Dieu & à nostre Souuerain, & n'auoir rien sur nostre conscience, qui puisse troubler le repos de nostre vie. Nous esperons Aduocats & Procureurs la mesme sincerité de vous : & vous coniurons par tout le pouuoir que nous auons sur vous, de ne vous engager iamais à soustenir aucune mauuaise cause, mais de soustenir avec vne fidelité inefbranlable, celles que vous iugerez dignes de vostre protection, afin que sans estre touchez d'autre passion que celle de seruir le public, vous fassiez paroistre le respect que vous protestez auoir pour cét Auguste Corps, l'obeyssance que vous deuez à vostre Souuerain, & la crainte que tout Chretien en doit auoir, d'enfreindre les Commandemens de celui qui nous enioint de faire pour autrui, ce que nous voudrions qu'on fist pour nous mesmes.

F I N.







